



湖廣通志

人物

五十三

內閣文庫	
番號	漢 14208
冊數	100(52)
函號	史 130 1





湖廣通志卷之五十三

人物志 行業

安陸府

漢劉焉後漢書列傳字君郎魯恭王後肅宗時徙竟陵少仕州郡以宗室拜中郎後去官居陽城山積學教授舉賢良方正歷宗正太常因益州亂出為監軍使者領益州牧興平元年卒子璋代為刺史

南北朝張齊字子嚮其先馮翊人徙居郢州之橫桑少有膽氣張稷為京府司馬甚相知齊高祖受禪以齊為歷陽太守目不識字吏事甚修尋遷巴蜀在益部累年戰無寧歲親勞士卒同勤苦頓捨城壘皆委曲得其便

蠻不敢犯遷新興永寧二郡太守諡曰壯 舊通志

宋朱震宋史列傳字子發荆門軍人政和中進士仕州縣以廉稱胡安國薦於高宗趙鼎亦首薦召問易春秋擢祠部員外郎兼川陝荆襄都督府詳議官言沿漢上下七百里膏腴之田宜招集流亡務農種穀不出三年兵食自足遷祕書少監建國公出閣以震為贊讀遷中書舍人兼翊善遷翰林學士言處州治盜宜擇廉吏上皆從之徽宗未耐廟太常奏行明堂祭震舉王制止之不從後謝病卒震經學深醇弟異亦富文學號為二朱別之傑宋史列傳字宋才郢州人嘉定二年進士累官至江陵府湖北安撫副使上言親年八十乞祠歸養從

之主管崇禧觀尋加兵部尚書進端明殿學士淳祐中為叅知政事乞歸田里卒贈少師

元李士瞻字彥文荆門人登進士歷戶部侍郎擢福建遼陽路行省左丞官至榮祿大夫翰林承旨著有經濟集 舊通志

張淵道明一統志天門人與弟從道俱以文學知名同舉進士淵道官至祕書監都事從道武昌路通城縣達魯花赤

明胡美沔陽人初名廷瑞避太祖字易名美為陳友諒江西行省丞相守龍興太祖遣使招諭美使鄭仁傑請降太祖許之命將其兵從徐達征武昌取淮東進伐張

士誠下湖州等處師還加榮祿大夫又命爲征南將軍
取福建盡得其地尋召還太祖卽位以爲中書平章同
知詹事院事洪武三年論功封豫章侯食祿千五百石
賜鐵券改封臨川侯

明史稿

李廷琛分省人物考一名深天門人初從鄧愈取江南
晉陵徽州婺源攻雪川拔龍灣佐平饒州擣潯陽徇蕪
黃下豫章戰彭蠡定武昌江陵及湖之南北又從克襄
陽安陸等處累功授竟陵衛指揮副使鄧愈以湖廣行
省平章鎮襄陽廷琛屬焉嚴號令練軍伍繕甲兵修屯
田西禦王保保兵遇征討則備前驅洪武元年愈統領
襄陽等衛官軍征取河南迤北琛同指揮吳復等攻取

南陽各屬克之又平新寨麻張等叛賊克光石臘寨降
葉舞陽魯山等縣從拔徐州擊洪山老馬劉寨擒殺甚
衆是年冬從討河西於是金商均房諸州悉定三年西
擊王保保營五年從討濠州等處溪洞蠻夷皆有功
張天麟荆門人洪武初知天門與指揮李廷琛修築城
垣協力保障境內賴之

初進忠潛江人洪武中以懷才抱德舉授衛輝府推官
公明善斷嫉惡如仇調汝縣令卒於任俸入僅具棺殮
妻子幾不能歸

以上舊通志

歐陽謙分省人物考字伯益沔陽人洪武中舉明經授
耀州學正擢御史永樂初谷庶人叛命謙密察之謙野

服具舟隨賈人之長沙具得庶人密謀歸報遂討其罪
 以功改編修轉考功郎中優於文學所著有滄浪集
 張從道京山人洪武中舉於鄉除廬州通判勤能有聲
 永樂初以賢能薦擢徽州太守在任盡心民事有古循
 吏風後調永平守政聲益著

舊通志

但元行楚紀鍾祥人洪武中知武寧開荒田興水利建
 公署惠政甚多民咸賴之
 朱敏字永昌分省人物考荆門人永樂壬午舉人拜御
 史風采凝重囊無贏餘嘗以事累被抄惟敝衣一襲成
 祖聞之賜鋪陳褥被各二套以寵異之卒於官歸葬命
 沿途有司祭奠

虞信楚紀字尚忱沔陽人永樂中貢生拜御史有直聲
 擢四川按察副使蜀有悍民為鄉邑患信首除之遷山
 東按察使子受屬吏金硯信覺繫其子以聞上付信自
 治竟撲殺之轉河南左布政性亢直人不敢干以私
 李浩分省人物考字德廣安陸州人正統丁卯貢生拜
 兵科給事中英宗見其儀狀偉甚超遷南工部侍郎勅
 總京儲兼理屯政處置咸宜後轉貴州布政司適苗獠
 為患拜副都御史往撫治之四川大壩賊亂率兵征勦
 所向克捷

從龍明一統志字雲峯安陸人為弟子員時學正朱輝
 卒於官龍扶其櫬還鄉安厝乃歸天順乙酉中鄉試知

麻哈州俗未知禮義聘隣郡諸生教導之歷任五年民
立生祠祀之懷慶守缺吏部疏龍名以上逆瑾求賂龍
三疏乞休獲允月給米以獎恬退嘉靖改元進階朝列
大夫壽九十一卒至今鄉人稱剛正者以龍爲首

劉鈺分省人物考字世美沔陽人父苙隸戎天津生鈺
成化丙戌成進士選庶吉士授戶部主事嘗督課九江
羨餘悉貯府庫尋守常州廉明勤慎吏民敬憚豪右斂
跡母喪幾無以爲殮服除改守處州未幾父卒鈺感病
亦卒剛介自持所歷嚴肅歸自常民追送三瓜剖之乃
金百餘急還而遣之

郭軒字文載天門人成化庚子舉人授盧氏教諭以師
道自任多所造就遷福建連江令與丞不合卒於官丞
制之不得發諸生爲扶柩而出軒以剛正見重士類後
諸生顯者過縣必往拜其墓舊通志

劉洪分省人物考字希範鍾祥人成化戊戌進士授陽
穀知縣擢御史巡兩浙力剔鹽弊弘治壬子擢浙江按
察副使毀菴觀立鄉塾民知向方後巡撫貴州四川連
俘劇賊進右副都御史奏九事咸中肯綮丁外艱起總
督兩廣軍務平盜多功入掌南臺力振風紀不少徇避
年六十九卒子槃渠臬俱進士槃舉孝廉

孫交分省人物考字志同安陸州人成化辛丑進士弘
治初歷吏部文選郎中於善類多所推引遷太常少卿

提督四驛館正德初晉光祿卿時劉瑾竊政耗財交隨
機節縮省費不貲晉戶部尚書時征討流寇交區畫適
宜四方告饑者輒請捐租遣賑裁抑近倖不稍假八年
乞休歸世宗卽位起故官建言中官監餉冗蠹及論御
馬監豹房事上嘉納之尋以老致仕卒年八十贈少保
謚榮僖子元進士終四川副使謹厚有父風

王大本字立之京山人弘治壬子鄉薦令穎上有善政
百姓德之日進諸生論說古今未幾謝歸清風兩袖囊
琴襖被而已舊通志

沈文華分省人物考字崇實鍾祥人弘治丙辰進士爲
刑部主事疏白陳敏政之冤奏事多平反歷官陝西提
學嚴立科條振作士氣尋以忤權貴歸隱龍化山足跡
不履公府捐貲廣學宮自撰記紀其事

裴春分省人物考字永年鍾祥人幼穎異志趣高遠積
學工文爲弟子員時讓廩於謝生日彼貧乏年且邁余
督學特優獎之正德丙子舉於鄉授丹徒教諭尋調長
洲嚴架範課行業士人多所造就擢南戶部主事督理
京儲會計允當進郎中以扈蹕陪祀賚予銀幣有差出
守延平卹民隱解宿弊平反重囚多所全活

童承敘分省人物考字士疇沔陽人童時卽解聲律諳
詞章十餘齡通經史百家登正德辛巳進士授翰林院
庶吉士嘉靖時充經筵講官上御文華殿進講周書極

陳王業艱難周公夾輔之忠詞意切至上改容聽焉後
 遷國子司業疏明監規五事學政六事皆鑿鑿可紀祭
 酒呂柟以推明正學為已任乃討樂律興典禮崇先王
 之化承敘與之協合柟喜曰吾教其有興乎庚子主順
 天鄉試人咸以得士稱尋假歸卒賜祭葬

陳柏字憲卿沔陽人嘉靖庚戌進士以才望調兵部職
 方備兵井陘與嚴嵩不合左遷歸閉門著述年六十修


高年會比香山洛社 舊通志

李得春字元甫鍾祥人嘉靖癸丑進士由推官擢禮科
 給事中時嚴嵩當國春抗疏極諫出尉泰輿轉石球令
 多政績陞濱南僉憲以內艱歸杜門謝請託遇地方利

病直言多所裨益

曾省吾字恪菴鍾祥人參議璠之子嘉靖丙辰進士初
 授富春令有異政歷陞太僕卿萬曆初以相國張居正
 薦拜御史中丞撫蜀時蜀土司都蠻恃九絲城之險屢
 叛省吾素長將畧運籌決策出人意外卒平其亂拓地
 四百里得武侯所遺銅鼓九十三面而還加大保工部
 尚書

王宗載字時厚京山人嘉靖壬戌進士授海鹽令徵為
 御史巡視北城繩巨璫京輦肅清中貴人守獻陵倚勢
 作威梁鄆二藩設奉祀元佑宮增道官守陵添設錦衣
 衛使載抗疏悉言其害上皆報可冒濫為之一清出按



閩會海寇內訌載職紀功品隲文武將吏功罪犁然晉大理右少卿歷僉都御史巡撫江西尊協理院事所至有聲

聶武字仁卿當陽人隆慶丁卯鄉薦除陝西富平令涖政精嚴發摘如神有僧匿民婦歷年無問者武廉得狀置之法焚其寺人稱神明

陳所學字正甫天門人萬曆庚辰進士歷刑部主事典試淮南司權武林守新安累官大理司徒涖任日值楊漣疏劾逆璫禍且不測學上疏力救不報遂決計請歸王階字震吉京山人萬曆癸未進士初授行人再任戶部上疏陳文武利弊大司農爲之心折監兌蘓松諸郡

漕糧臨清倉場先後積羨一千二百有奇具疏上之遷漳州知府卒於官

譚完字伯趙京山人萬曆乙酉鄉薦官許州學正遷銅仁司理性剛直清白自矢有土司欲脫重辟投以金諭而却之時播亂初平安集流亡甚衆移同知臨洮有縣令遺扁鑰一積署曰某書完受之啟櫝則金壘一具也怒而還之嘗攝鎮遠府新守將至吏白耗羨千餘金宜歸私橐完不納病卒僚屬爲具舍殮資其路費櫬乃得歸

王制字幼度京山人萬曆甲午鄉薦署上海諭旋除龍門令時粵夷盤踞香山爲崇墉截堞總督何檄制毀其

城垣制軍騎馳往諭以禍福諸倭咸震懼無敢忤竟折
香山嶼何嘆曰我知非爾不能隳此城也尋遷涿州守
以丁內艱歸林居二十餘年卒

潘達字劇驂京山人萬曆甲午鄉薦除成都令三載轉
同知西安所轄遼瀾俗多頑梗達單車撫循礦賊屏息
擢工部員外會逆璫創造肅寧宮司空令達監作辭以
疾遂稱達黨熊廷弼焉逾旬璫敗懷宗初復其官年七
十六卒

胡其慥字石廩京山人萬曆甲午鄉薦授樂昌令入爲
刑部主事時挺擊一案將興大獄慥謂罪止首犯不宜
累及無辜侍御劉貞一建言被逮慥奉旨擬罪堅執初

議出守武定漢獠雜處部內楊維楫董漢賢包藏不測
欲爲寇應慥以計擒二賊橫塘一戰斬馘千餘撫按竒
其功交薦之晉雲南叅議值草賊嘯聚攻掠城堡以計
梟其渠魁羣從潰散遷貴州叅政時魏璫禍熾楚人削
籍殆盡遂決計請歸

吳文企號白雪天門人萬曆戊戌進士除南戶部主事
權北新關減雜稅三百餘金有附璫者抵於法盡除其
害出守寧波丁內艱補湖州守備兵關西未幾調寧夏
寧夏古朔方地叛服不常而銀定獨黠時有老僧爲邊
人尊信企用其計銀定納款貢名馬事聞賚金賜秩一
日夢旌幢鼓吹來迎遂端坐而逝

謝奇舉字鳳毛天門人萬曆癸卯鄉薦授什加令重士愛民有循良聲未幾奢亂起攻陷州邑什加孤城無援舉捍禦有方邑獲全巡撫周著疏薦擢御史巡按陝西會權璫肆虐舉憤不顧身疏發其奸不報又糾叅秦撫喬某貪贖諸狀臺省察然奪乞休歸

鍾一貫字魯齋天門人惺父惺兩上公車不第貫勉之曰士君子當樂道安命不可躁進而懷怨尤事兄一理甚謹理病痺親嘗湯藥以明經授武進訓導以子惺貴封行人贈奉政大夫

魏士前字瞻之天門人萬曆庚戌進士授蕪湖令調吳江歷儀制司陞穎州兵備會龍華變起不數月戡定之及奸璫開屯江淮汝穎所在騷動士前調劑有法全活數萬人以忤璫免歸懷宗初補冀寧道平渠賊神一魁等轉川北道劾蜀藩御門僭制事再遷榆林道尋疏乞歸卒年六十有五

向日升字青楠鍾祥人萬曆癸丑進士授梁山令調丹徒遷兵部主事安苗肆逆升備兵思石應機撫勦方畧皆奇中卒平其亂歷陝西藩轄

鄭哲字闔塢鍾祥人萬曆戊午舉人廉靜力學寡交游不營生產博通陰陽理數之學

劉必達字士微天門人天啟壬戌進士第一授編修起居注管誥勅纂修國史晉侍講神宗實錄告成賜金帛

陞春坊右中允因母老請歸終養卒於家生平樂易無
忤胸懷坦直服官十餘年以清正著

鄭友鉉字元韋京山人天啟乙丑進士授青浦令調華
亭尋拜御史疏論奄寺變置軍政養暨總戎跋扈薊門

嚴旨降調尋以欠漕折被逮謫戍鉉為文峭厲別關蹊
徑詩語高寒比孟東野杜門掃迹歷十餘年卒

賀運和字仲文鍾祥人原籍荆門天啟甲子舉人篤學
力行以孝友著侍母病衣不解帶月餘居鄉循謹直指

使薦於朝稱曰真孝廉

譚元亮字擬陶天門人懷宗朝由恩選入國學署漢川
教諭修葺學廨教育諸生周其困乏性倜儻達有遠

識年六十四一日具衣冠沐浴召家人訓勉畢端坐而
逝以子篆貴贈翰林檢討


孫韓字伯馭鍾祥人明末辛未進士司徒交之孫力學
晚成由會稽令累遷廣東叅藩有惠政一時傳誦

楊文薦字又如京山人懷宗癸未進士授南武選主事
故事衛官承襲劍執贄於選司薦一槩謝絕海防同知

王菁客死於吳薦為經紀保全其家生平見義必為遇
不平事輒髭髯奮張與李維楨郝敬先後齊名

皇清歐陽忝字憲文潛江人性敏妙涉目成誦明丁丑進

士除江都令奏最入京順治初補授吏部文選員外
郎乙酉典試河南後以疾歸



劉渾孫字厚存天門人順治壬辰進士授永平司理
性剛直耿介冰檠自操讞獄無冤抑風裁振厲豪右
奸胥凜然不敢犯廉能之聲著於畿輔尋卒於行署
弟臨孫同榜進士授弋陽令有善政

胡鼎生字元羹天門人順治己亥進士授陝西石泉
令理冤獄減荒徵邑人德之丁內艱歸補進賢令歲
大旱暴露引咎旋獲澍雨未幾土寇圍城悉力捍禦
擒獻逆謀後徵爲御史

劉延唐字延綏天門人明庚辰進士

國朝初總督佟巡撫何聞其賢交薦委署荆西道招撫
流寇小秦王張九儒等三萬餘衆安插得宜綏定荆

襄安陸三郡流民以丁外艱歸兩兄早逝撫孤姪慶
遠慶久成名又倡修大成殿獨建明倫堂設義塾置
橋梁掩膏幣邑人至今德之子慶昌貢生

劉廣國字寶生潛江人順治己丑進士授高平令分
校晉闈補洿溪令邑遭土鎮殘害頻年不耕民多餓
死廣國買米以賑給牛種墾荒田取家貲貸償逋賦
數百金士人應考悉給卷貲路費擢刑部主事分校
順天轉禮部郎丙午典浙江鄉試遷漢羌兵備僉事
裁缺歸里潛之大患在隄防數苦隣邑板協廣國赴
荆集議堅定荆安兩不相協之案邑人永賴
白拱薇沔陽人順治壬辰進士令南靖邑被水患村

落多漂沒拱薇悉心籌畫收殮賑濟存歿均霑新學
宮之漫漶葺縣治之衝決築防蓄洩成西河壩之鉅
功明季征役繁重民多以田賤賣豪弁田去而糧仍
舊主追呼敲撲不堪其累拱獲銷除舊戶就田輸賦
擇豪弁之強項者痛懲以法徭賦始均祀福建名宦
譚篆字灌村天門人順治戊戌進士選庶常庚子典
試江南公明嚴正得人最盛補國子司業經指授者
皆以文名嗣纂修孝經進侍講每入直惓惓以用正
人端國本爲言

恩賚有加因母病告養歸里承權六年及母逝廬墓三載
凡伯叔子姪貧乏者皆資給訓課之推宅與從弟簾

簾歿代養孀母撫遺孤成立同村數百家瀕水苦澇
獨任修築不以累衆又條陳里役利弊邑人德之

楊佐國字荆湖荆門人順治辛丑進士初令陝西咸
寧時軍需孔亟能周恤民隱咸人勒其善政於石陞
商州牧甫三月吳逆賊黨圍城佐國竭力拒守賊退
猶出沒無常佐國巡歷山谷多方擒捕境以安陞授
刑部員外有貴家殺人同官多贍徇佐國獨持正司
寇魏象樞亟稱之卒從其議轉禮部郎典試廣西所
得皆正士授廣東驛鹽道緝私平價裕課便民攝南
韶道招撫花山賊改立花縣兩署臬篆活囚甚衆內
陞京堂歷遷太僕少卿卒於官性至孝每歷一官輒

勸哭以不及祿養爲憾尤友愛諸弟教之有成子毓
健順德知府

李思恒字克永荆門人性孝友年十一流賊亂被擄
母任氏守節遇害恒慟悼不欲生十六入郡庠異母
兄廢產以已產均之其爲學專尚躬行教人惟勉以
存心立品年七十五卒以子遵貴贈文林郎

江鼎金字紫九荆門人父上峯幼勤學動遵古處號
六未居士以生平未謁官府未走市廛未禱鬼神未
負鄰里未墜祖訓未累後人也鼎金成康熙乙丑進
士初合高苑縣招集流亡出粟賑貸編審杜賄除之
弊開豁孤寡民有我公減丁願公添丁之謠入爲西

曹多所平反督陝學公明寬大士林頌之補口北道
值禁旅西討監牧駝隻督辦器具調發轉運著有勤
勞歲饑詳請貸粟救濟地震捐貲市棺買地掩埋覆
歷之人年七十三乞休歸子五曾福江夏訓導培冠
邑令圻甲午舉人城開封通判慶國學生

顏翼祖字敬只沔陽人復聖齋領康熙戊午鄉薦簡
選改署公安教諭課業有方裁成受益者甚衆創設
學田不辭勞費修葺學宮尤盡心力後以會試卒於
都翼祖教學俱務真實右家敦睦修譜請廕以篤本
源子晟星俱舉於鄉晴塲咸食餼賜以哭母殞身其
妻王氏亦以身殉

胡作梅字修予荆門人康熙壬戌進士選庶吉士戊辰充會試同考官所拔同錫爵陶元淳孫致彌等皆單寒宿學人咸服其公明壬午督學陝西拔孤寒端士習請託一無所徇戊子擢祭酒旋進少詹辛卯典試浙江癸巳典試江西首稱得人陞禮部侍郎後督餉塞外逾年染病猶力疾辦事等卒事聞

聖祖軫念優卹給葬費

遣官致祭

高登先字于岸鍾祥人少嗜學肆力於性命之旨以橫渠濂溪爲宗成順治己亥進士初令山陰邑巨蠹滋弊登先廉得之悉寘於法除火耗捐雜徭邑人德

之尤加意造士一時掇巍科如秦宗游余秦來李大芳魯德升輩皆出其門鄰邑有無賴生夥綠林將劫一富賈聞在山陰界遂捨去曰無累仁賢父母甲寅耿吳爲逆諸暨何克忠乘隙倡亂守將征之不克登先單騎抵其營諭之遂投戈解散補任常熟再詳請減蘓松二郡浮糧數百年積困獲甦陞涿州牧涿之混河有水怪常爲民害登先詣水濱草疏焚之怪遂已初登先幼失怙事母至孝明季流寇克斥母卒未殯賊適至欲掠之去因環尸慟號賊義而釋之且爲藁葬淺土其至性感人如此

德安府

海虞通志 卷之五十三
晉朱伺 晉書列傳 字仲文安陸人少爲吳牙門將吳平
內徙江夏伺武勇口訥不知書爲將以謙恭稱張昌反
伺率部黨攻滅之其後陳敏作亂陶侃鎮江夏以伺能
水戰乃遣作大艦署爲左甄據江口破陳敏兄弟又隨
侃討杜弢陳聲有功加廣威將軍領竟陵內史時王敦
弟廙代侃爲荊州遣伺歸楊口壘被杜會圍墜水沉行
五十步乃免尋卒葬甌山

南北朝 徐度 陳書列傳 字孝節安州安陸人少倜儻姿
貌瓌偉初從梁蕭介征諸洞以驍勇聞後隨武帝克侯
景於廣州封廣德縣侯帝討杜龕以度領宿衛竝知留
府事明年徐嗣徽等濟江度隨衆軍破之於北郊壇

郢州刺史歷封湘東郡公帝崩度預顧命廢帝立進司
空卒諡忠肅配享武帝廟廷子敬成

徐敬成 陳書徐度傳 敬成幼好讀書以識鑒知名起家
著作佐郎元嘉四年度自湘州還朝敬成盡領其衆隨
章昭達征陳寶應晉安平除豫章太守華皎謀反以敬
成都督巴州諸軍事尋詔爲水軍隨吳明澈征皎累遷
吳興太守後隨澈北討克淮陰山陽鹽城三郡并連口
胸山二戍仍進克鬱州以功進號壯武將軍年三十六
卒贈散騎常侍諡思子敞嗣

唐許紹 唐書列傳 字嗣宗安州安陸人爲兒時與高祖
同學相愛大業末任夷陵通守會盜起州境獨完流人

自占數十萬開倉賑給後入唐任峽州刺史封安陸郡公武德初以破蕭銑功官其子智仁爲溫州刺史進譙國公賜帛千段趙郡王孝恭等伐銑復詔督兵圍荊州會病卒於軍帝爲流涕

互詳荊州名宦志

樊興唐書裴寂傳興安州人從唐公平長安授左監門將軍從秦王積戰功封營國公貞觀六年陵州獠反命討之爲左驍衛將軍尋爲赤水道行軍總管太宗征遼以興忠謹副房元齡留守京師卒贈左武侯大將軍洪州都督陪葬獻陵

宋昌言宋史宋綬傳昌言字仲謨安陸人敏求族弟以廢爲澤州司理叅軍州有殺人獄昌言疑其冤堅請

迹捕果得正犯遷河陰判官見道上棄屍若剛剝狀旣至得凶盜六輩殺人以鬻掩其家猶得執縛未殺者七人昌言窮治之擢都水監丞熙寧初河決棗彊而北昌言建議欲於二股河口西岸障水使東流以除恩冀水患朝廷遣司馬光往視如昌言策不兩月決口塞光奏其功遷開封府推官轉少府監卒

元趙復元史列傳字仁甫德安人太宗命太子濶出帥師伐德安以嘗逆戰其民數十萬皆俘戮無遺時楊惟中行中書省軍前姚樞奉詔卽軍中求儒生挂俘籍者輒脫之復在其中樞與之言信奇士欲與俱去復以九族俱殘不欲行樞恐其自裁畱帳中共宿旣覺月色皓

然惟寢衣在遠馳馬周號積屍間無有也行及水際見復被髮徒跣仰天而號欲投水而未入樞力救得免乃強從而北先是南北道絕載籍不相通至是復以所記程朱諸經傳注盡錄付樞燕地從學者百餘人世祖在潛邸嘗召見問曰我欲取宋卿可導之乎對曰宋吾父母國也未有引他人以伐父母者世祖悅因不强之仕惟中與樞謀建太極書院立周子祠以二程張楊游朱六君子配食選取遺書八千餘卷請復講授其中復以周程後其書廣博學者未能貫通乃原羲農堯舜所以繼天立極孔子顏孟所以垂世立教周程張朱所以發明紹續者作傳道圖而以書目條列於後別著伊洛發

揮以標其宗旨緝錄朱子門人共五十有三人作師友圖以寓私淑之志又作希賢錄使學者知所嚮慕由是許衡郝經劉因皆得其書而尊信之北方知有朱程之學自復始爲人樂易耿介雖居燕不忘故土與人交尤篤分誼元好問文名擅一時復嘗以博溺心未喪本勗之家江漢之上人稱江漢先生祀鄉賢

明王興福隨州人元至正間守徽州有善政遷知杭州時杭初內附人心未安福明於大體寬簡不苛深慰民望洪武二年秩滿召還朝父老遮留因慰諭遣之曰予匪能惠爾乃爾能奉法遵約束耳太祖嘉之擢吏部尚書坐事左遷西安知府卒於官

舊通志

蕭壽字君美德安人年二十陳友諒起荆湖拔爲萬戶
壽日夜思自拔及友諒戰死乃以所領舟師歸明太祖
於鎮江授總旗守嚴州張士誠軍大浪灘其舟如織壽
乘快船挺戈而前大破之又攻台州福建乘勝席卷諸
城悉平擊海寇獲全勝以從李文忠功加承信校尉復
擊山寇破數十砦斬首數百級生得將士三十人奏功
賜賚楮幣

王鏞隨州人洪武初薦授鎮江府通判擢知嘉興府政
績卓異入爲戶部侍郎每復出知嘉興久之免歸

程本雲夢人端方亮節洪武初以人才任本縣訓導陞
代府奉事王多失政本直諫王杖之幾斃已而失政上

聞府官僚皆獲罪本獨獲宥後陞汝寧府同知賢聲益
著

楊濬字希武應城人景泰庚午舉人持身方正取捨不
苟任雲南提舉念二親衰老途遠不能迎養解綬歸祖
產及俸餘悉授諸季其弟淵歲貢性亦孝友博學工文
隱居不仕

徐珪字必信應城人弘治間以掾役刑部時闕宦李廣
用事其黨楊鵬監東廠羅織朝士珪手疏數千言斥廣
鵬竊柄不利於國乞革東廠或遣文臣兼理之有必斬
臣首必行臣言等語詔下獄除籍踰年主事陳鳳梧以
爲言授桐城縣丞擢贛州府通判有平寇功加知州俸

李有成字文巖雲夢人攻苦積學負笈從遊者數百人嘉靖甲子舉於鄉令汶川其地漢苗雜處成多方安輯苗首渣兒木等終無異志邑人祠祀之

周琬字潤夫應城人嘉靖壬辰進士知永嘉拜吏科給事中敢言直諫世宗南巡疏擊權貴杖謫典史起知婺源為福建督學能拔奇士會倭亂詔督蘓松等處軍務進兵部右侍郎以病免歸以上舊通志

傅鳳翔分省人物考字德輝應山人嘉靖癸未進士令上蔡拜監察御史歷兵部協理戎政鳳翔天性豁達才復通敏初築上蔡城區畫不擾民祠之按江西浙江歷撫安肅陝西所至大著風裁居家孝友處鄉以信義見

稱卒贈右都御史

李幼滋字元樹應城人嘉靖丁未進士授行人拜刑科給事改禮科以拂權奸意謫邵武縣丞移安慶推官累遷工部尚書加太子少保秉性端嚴不與人狎泣官持

法居鄉秉禮卒賜祭葬舊通志

陳渠字應虹應城人隆慶戊辰進士累官戶部尚書贈少保性嚴正詳明為政廉能有聲卒於官

饒琮字荆璧應城人萬曆戊子舉人令宜賓有惠政歲饑出俸行賑全活數千人考最擢知全州百姓為之立祠

胡登亮字尹瞻雲夢人萬曆庚子舉人由教諭授資陽

令甫二載聞母訃左右勸勿遽發喪亮正色斥之即解印綬去官補合彭澤歲旱設壇祈禱寢食郊外遂大雨霑足後致仕歸

周師旦字句嚶應城人萬曆辛丑進士初任廣西永州旋調巴縣考最授浙江道御史巡按宣大糾代府紆商困劾貪弁轉江南督學奏罷納資入學士林稱之

徐養量字京成應城人萬曆丁未進士以御史督學北直拔取真才人服藻鑑撫甘肅時一小吏以足病注下考比謁見捷如飛翼量曰此必拙宦也奈何以疾寃之并語在事者勿恣情去留屢官兵部尚書卒賜祭葬子吾可廕錦衣衛千戶懷宗丙子獻賊攻城城破罵賊死

楊所蘊字响嘯德安人萬曆丁未進士知洛陽值福王就封中璫橫甚悉以理法裁抑之迄無所撓歷順慶知府乞歸築小有園嘯咏其中卒年八十

李芳華字光遠安陸縣人懷宗甲戌進士性孝友兄弟共爨無間言授太平司理流寇薄江北華以監紀守采石巖戢禁旅民賴以安尋卒蕪湖居民建坊磯上以表其功 以上舊通志

皇清楊紹先字繼美安陸縣人順治壬辰進士授翰林編修博綜淹貫記注得大體調江西南建昌副使察吏安民風裁整肅以疾乞歸不履城市者十餘年卒
楊苞字竹如之易子忠烈冢孫以廕補洛陽令有惠

政陞廣德州知州行取工部員外郎致仕歸校刻忠烈公遺集傳於世

張最應城人康熙癸丑進士歷官江西驛鹽道勤持大體重建楊子洲塔勝王閣災獨力重新之觀風十

三郡加意人才多所造就
程大夏應城人康熙己未進士令黎城平易近人兒童婦女胥得陳疾苦潔己愛民不名一錢勤於吏治案無留牘尤加意學校以文藝請者抉摘是非不少諱蒞任三年行取禮部邑人送者如蟻蓋戀戀不舍云

荆州府

〔漢〕胡剛〔後漢書胡廣傳〕剛廣六世祖清高有志節平帝時大司農馬宮辟之值王莽居攝剛解衣冠懸府門而去遂亡命交趾隱於屠肆間後莽敗乃歸

胡廣〔後漢書列傳〕字伯始南郡華容人廣少孤貧及長入郡為散吏太守法雄奇之遂舉孝廉到京師試以章奏安帝以廣為天下第一旬月拜尚書郎五遷尚書僕射漢安元年遷司徒代李固為太尉以定策立桓帝封清陽安樂鄉侯靈帝立與太傅陳蕃參錄尚書事代為太傅時年已八十而心力克壯繼母在堂朝夕瞻省傍無几杖言不稱老及母卒居喪盡哀率禮無愆廣性溫柔謹素常遜言恭色達練事體明解朝綱故京師諺曰

萬事不理問伯始天下中庸有胡公按漢書註華容故城在荊州東舊志云卽今監利非岳州之華容也

晉樂廣字彥輔南陽滎陽人居江陵晉書列傳廣僑居

山陽性冲約有遠識尤善談論王戎爲荊州刺史廣爲夏侯元所賞乃舉爲秀才裴楷又薦於賈克歷太子舍人衛瓘見而奇之命諸子造焉曰此人之冰鏡見之瑩然若披雲霧而覩青天屢遷侍中河南尹爲政無當時功譽然每去職遺愛爲人所思凡論人必先稱其所長人有過先盡弘恕時王澄胡毋輔之等皆任放達廣曰名教中自有樂地何必乃爾後遷吏部尚書左僕射三子凱肇謨俱仕

朱詹世居江陵性好學家貧無資累日不爨乃時吞紙以實腹寒無氈被抱犬而臥犬亦饑虛起行盜食呼之不至哀聲動隣猶不廢業卒成學士官至鎮南錄事參

軍爲孝元所禮

舊通志

南北朝樂預南史樂頤之傳預字文介江陵人官至驃騎錄事參軍隆昌末以忠義勸徐孝嗣勿臣二姓建武中爲永安令人懷其德時有一媪擔榭菽葉造市貨之聞預亡棄葉溪中泣曰失樂令我輩孤獨老姥政應就死耳市人亦皆泣其惠化如此


宗夫南史宗慤傳夫字明敬自涅陽徙居江陵祖景宋徵太子庶子不就夫少勤學有局幹舉州秀才歷行參

軍齊司徒竟陵王集學士於西邸竝見圖書夫亦預焉
尋管書記歷遷郢州治中以父老去官南康王引為別
駕義師起遷西中郎高祖師發雍州遣夫出自揚口面
奏經畧高祖甚禮之累遷五兵尚書參掌大選卒年四
十九從弟兵有各行累官錄事參軍

庾杲之南史列傳字景行江陵人幼有孝行司徒劉劭
見而竒之謂曰見卿足使江漢望崇杞梓發聲解褐奉
朝請稍遷駕部郎清貧自業食惟生韭數種而已王儉
用為衛將軍長史安陸侯蕭緬與儉書曰盛府元僚實
難其選庾景行泛綠水依芙蓉何其麗也再遷尚書吏
部郎太子右衛率加通直常侍卒諡貞

樂藹南史列傳字蔚遠廣六世孫世居江陵生而方願
隆準舉動醞籍其舅雍州刺史宗慤嘗陳噐物試諸甥
侄藹時尚幼所取惟書遂竒之仕齊為驃騎參軍武帝
見藹占對詳敏累擢御史中丞領本州大中正出為廣
州刺史徐元瑜叛藹誅之子法才字元備為建康令不
受俸秩武帝嘉其清節歷遷江夏太守弟法藏任征西
參軍子雲美為江陵令死難

庾域南史列傳字司大自新野遷居荊州少沉靜有名
鄉曲梁武帝為郢州辟為主簿嘆美其才曰荆南杞梓
其在斯乎加以恩禮長沙宣武王召為錄事參軍魏園
南鄭能保城退軍以功拜羽林監後隨長沙王至益州



爲懷寧太守罷任還家妻子猶事井臼而身衣大布餘
俸專克奉養母好鶴唳域孜孜營求不怠忽有雙鶴來
庭咸謂孝感所致後爲寧朔將軍巴西梓潼太守魏襲
巴西城固守城中糧盡將士皆齷草供食無離志魏軍
退進爵爲伯卒於官

庾於陵南史庾易傳陵字子介七歲能言元理比長清
警博學有才思隋王子隆召爲荊州主簿與謝朓宗夬
抄撰羣書及王爲明帝所害僚吏畏避獨與宗夬留經
理喪事尋除遂安令爲大吏所稱天監初遷尚書功論
郎待詔文德殿拜太子洗馬舊東宮官屬通爲清選而
洗馬尤清貴皆取甲族有才望者時於陵先擢此職時

論以爲榮累遷中書黃門侍郎終鴻臚卿

劉之遴南史劉虬傳遴字思貞虬子八歲能屬文比長
篤學博瞻年十五舉茂才明經對策沈約任昉見而異
之尚書王瞻調爲太學博士爲昉作尚書謝表操筆立
成昉曰荆南秀氣果有異才簡文臨荊州遷南郡太守
武帝謂之遴母年高轉西中郎令就養後爲都官尚書
太常卿之遴好古愛竒嘗聚古器數十百種著春秋大
義十科左氏十科三傳同異十科避難南還湘南王繹
酖之子三達少善屬文年十二聽江陵令講禮還覆述
不遺一字年十八卒之遴題其墓曰梁妙士

劉之亨南史劉虬傳亨字嘉會年四歲出後叔父嵩及

長好學美丰姿善占對武帝謂其父虬曰之遴必以文章顯之亨當以功名著後州舉秀才除太學博士代兄爲中書舍人累遷步兵校尉大通六年出師南鎮詔之亨以司農卿爲行臺承制途出本州北界總督衆軍仗節而西樓船之甲甚盛鄉部偉之是行也大至剋復因爲蘭欽所訟未被封賞止復本位後帝讀陳湯傳感悟封臨江子不拜以與朱异不協出爲南郡太守著有異績吏人稱之荆土之人不復稱名號大南郡小南郡宗元饒南史列傳江陵人少好學以孝敬聞仕梁爲外兵參軍高祖受禪累官至尚書左丞軍國事無巨細一以咨之遷御史中丞時合州刺史陳哀賊私狼藉元饒

劾之可其奏官南康內史以秣米三千餘斛助民租課存問高年拯救乏絕百姓甚賴焉以課最入朝歷遷吏部尚書

庾曼倩明一統志南郡人早有令譽仕梁爲中錄事元帝嘉之謂劉之遴曰荆南信多君子

宗慄北史列傳字元慄江陵人少聰敏讀書晝夜不倦語輒引古事鄉里號爲小兒學士梁元帝鎮荊州令兼記室嘗夕被召宿省使製龍川廟碑一夜便就元帝嘆美之後歷臨汝建城廣晉三縣令母憂去職哭則嘔血每旦有羣鳥數千集舍候哭而來哭止而去時以爲孝感所致梁封信安縣侯累遷吏部尚書後拜車騎大將

軍儀同三司有集二十卷

徐世譜南史列傳字興宗魚復人世居荊州勇敢有膂力善水戰討侯景擒其將任約攻郢州降其將朱子仙以功除信州刺史封魚復縣侯侯景平復以功除衡州刺史資鎮河東太守高祖拒王琳水戰之具悉以委之性機巧諳解舊法所造器械隨機損益妙思出人世祖嗣位歷官光祿大夫卒諡桓侯弟世休隨征討亦有戰功封枳縣侯卒諡曰壯

唐劉洎唐書列傳字思道江陵人貞觀七年擢給事中轉治書侍御史時尚書省詔勅稽壅洎言貞觀初左丞戴胄右丞魏徵應事彈舉無所回撓百司震肅不敢懈

今宜精選左右丞兩司郎中非惟救曠滯固當矯趨競也未幾拜尚書右丞尚書復治如徵時累遷散騎常侍黃門侍郎太宗好持論與公卿言必往復詰究洎諫當降慈旨假柔顏虛心聽納帝優詔荅之皇太子初立上書宜授以良書娛以佳賓使聽所未聞觀所未見帝卽勅洎與岑文本馬周逾日直東宮稍遷侍中及征遼詔兼左庶子檢校民部尚書輔太子監國後帝惑褚遂良之言賜死文明初詔復官爵

岑文本唐書列傳字景仁其先棘陽人祖善方後梁吏部尚書更家江陵年十四詣司隸理父寃作蓮花賦遂得直河間王孝恭平荊州本說止侵掠署別駕歷侍郎

專典機務封江陵縣子時魏王泰有寵文本上疏勸崇
節儉陳嫡庶之分宜有抑損帝善之爲中書令以非勳
舊責重位高有憂色或勸營產業嘆曰吾漢南一布衣
無汗馬勞以文墨位宰相俸已重尚何殖產業耶後從
帝伐遼東至幽州以勞瘁暴病卒年五十一贈侍中廣
州都督諡曰憲

劉孝孫唐書褚亮傳孝孫荊州人祖貞周石臺太守孝
孫少知名大業末爲王世克弟杞王辯行臺郎中辯降
衆引去獨孝孫攀援號慟送於郊貞觀六年遷著作佐
郎屢遷太子洗馬未拜卒

俞文俊舊唐書列傳江陵人則天初年新豐因風雷山
移乃改縣名爲慶山四方畢賀文俊上書言以女主蒞
政剛柔交錯故地氣隔塞山出爲災宜側身修德以答
天譴則天怒流之嶺外後爲六道使所殺

岑羲唐書岑文本傳羲字伯華文本孫累遷太常博士
坐伯父長倩貶復以薦爲中書舍人時武三思用事敬
暉欲表削諸武封王者衆不敢草獨羲爲之左遷祕書
少監後進吏部侍郎官至侍中初節愍太子之難冉祖
雍誣中宗連謀羲保護得免後帝見實錄褒賞之兄獻
爲國子司業仲翔陝州刺史仲休商州刺史

岑參全唐詩小傳參文本之後少孤貧篤學登天寶三
載進士第由率府參軍累官右補闕論斥權佞改起居

郎尋出爲號州長史復入爲太子中允代宗總戎陝服
委以書奏之任由庫部郎出刺嘉州杜鴻漸鎮西川表
爲從事以職方郎兼侍御史領幕職使罷流寓不還遂
終於蜀參詩辭意清切迴拔孤秀多出佳境每一篇出
人競傳寫比之吳均何遜焉

段文昌唐書段志元傳文昌字墨卿世客荊州疎爽任
義節節度使裴胄禮之胄採古今禮要數從文昌質判
所疑後依韋臯臯表爲校書郎遷翰林學士中書舍人
穆宗卽位召入思政殿顧問率至夕乃出俄拜中書侍
郎同平章事後授西川節度使素諳蜀利病寬靜威斷
羣蠻震服太和四年徙帥荆南民有旱不苦禱而雨雨

不愁公出游之謠南詔襲南安詔使下檄慰讓卽日
去復節度西川卒於官贈太尉

宋唐介宋史列傳字子方江陵人父拱卒漳州人知其
貧合錢以贖介尚幼謝不取擢第調平江令辨民李氏
誣獄再知任邱沿邊苦塘水歲溢中人楊懷敏欲割邑
西十一村地瀦漲潦介築隄闌之民以爲利後入爲殿
中侍御史與包拯吳奎爭張堯佐驟除宣徽等四使事
並劾宰相文彥博資緣諫官吳奎表裏觀望貶英州由
是直聲動天下復召爲御史言事益無所顧英宗時知
太原夏人數擾邊多築堡境上介悉撤之諭以利害遂
不敢動熙寧元年拜參知政事帝欲用王安石介言其

難大任且言安石好學而泥古議論迂濶若使爲政必
多所變更自是數與爭論帝主其說介不勝憤疽發背
卒年六十當疾急時帝臨問流涕以畫像不類命取禁
中舊藏者賜其家贈禮部尚書謚質肅子淑問義問孫
恕意竝仕有名

高懌宋史列傳字文悅荆南高季興四世孫十三能文
通經史百家從种放隱終南受業放奇之不敢處以弟
子行與張蕘許勃號南山三友會詔舉沉淪草澤寇準
薦之辭不起景祐中錄侯王後懌推其弟忻得官及范
雍建京兆府學召懌講授諸生席間常數十百人仁宗
命爲大理評事懌固辭賜號安素處士給良田五百畝
文彥博表其經術該通有高世之行可以勵風俗詔賜
第一區嘉祐中除光祿寺丞復固辭夢道士持素書聘
爲白鹿洞主遂卒

項安世宋史列傳字平甫其先括蒼人徙居江陵淳熙
二年進士除祕書正字光宗以疾不過重華宮安世上
書請往定省言甚迫切寧宗時朱熹召至闕未幾予祠
安世上書畱之俱不報與吳獵善坐學禁廢後爲湖廣
轉運判官未上奪職嘉定元年卒著易玩詞等書行於
世

元張之才峽州人學宗關洛不屑屑章句辨朱陸同異
甚悉以明經舉屢典州郡舊通志


明傅瓛分省人物考松滋人吳元年授江西行省陳友諒既平歷官參知政事與李善長定律令務從簡當洪武元年上郊廟議時京師火四方水旱相仍帝諭修省獻以天心仁愛為對因以調燮有乖引罪自居於是詔中書省及臺部集耆儒講求弭災事宜

唐本忠分省人物考監利人洪武初舉經明行修授京山教諭建學育士甚有創始之績孫素景泰癸卯舉人知崑山有惠政拜南監察御史羸馬敝衣為時稱尚王賢字希昭明一統志江陵人洪武初入太學與友王讓同居讓幹辦往江南以銀十兩衣一篋托賢收之未幾賢除鹽城令讓回除泌陽令尋卒後十餘年賢致仕

還家以所寄物與讓子不受曰吾父彼時安有此物賢固與之其子啟封見父故衣乃泣而受

張武遠安人洪武甲子舉人授鳳陽府同知有冰檠操卒於官宦橐蕭條不能歸葬事聞詔諸道奠送還里舊通志

謝恭宜都人洪武中由貢累官浙江道御史清廉明肅考績稱最以親老告歸行李蕭然侍郎高啟贈以詩鄧之和字以行監利人姿儀瓌偉補國子生高皇見而竒之授福建右布政使賜以襲衣重衾實欵士類榮焉和益感奮典藩政弘達經要君子以為知體坐奏事受逮久之事白復官未任卒



艾良字楚善監利人沉靜寡言於物無忤時詔廷臣各舉所知御史裴汝器薦良遂拜監察御史擢詹事府丞尋轉大理寺丞以詳慎稱

趙緯字大經監利人性明敏嘗爲大興教諭靖難初留守北平歷陞按察司副使以言事調浙江先是仁宗在東宮緯忤旨及仁宗立入覲謫嘉興典史歿後憐其志賜祭葬以上舊通志

劉傑分省人物考江陵人永樂十二年舉經明行修擢吏科給事中彈劾無所避尋補雲南布政司參政興利剔弊民夷翕服謝政歸家甚貧時論賢之

李志楚紀松滋人永樂中舉人拜監察御史剛毅執法

宣德間屬國朝貢不至命志擊之志奏曰古者馭夷來不拒去不追今朝貢雖缺遽加以兵非懷遠之道遂罷兵

裴綸字景宜監利人璉次子永樂十九年進士廷試一甲第三人與劉球最善嘗忤王振振以他事中球罪竝厄綸不得朝謁英宗一日顧問曰白面翰林裴綸安在振始不敢加害景泰初補山東左藩劾罷鎮守太監覃廣後贈禮部尚書諡曰文僖舊通志

劉昇字成之監利人令巫山舊有茶稅昇不欲白染乃輸稅於府邑爲峽口要道民苦遠送昇出金募人應役而民力少紓邑人祀之

徐貞遠安人永樂間由歲貢授渭南令調翼城隨上親征有功陞雲南霑益州同知時母總管與土知州構隙地方騷動貞親詣貴州水西宣慰安民二年方解釋

陳鑰字孔貞夷陵人少讀易至遷善改過句遂慨然為善過二格晝所為焚香記之好施與周人之急屢焚其券後仕榮藩四子五孫登仕版者六人 以上舊通志


張純分省人物考字志忠江陵人永樂辛丑進士宣德初授監察御史值歲大旱乃捐銀帶脫簪珥易粟為粥活民正統中擢監察御史上言十三事悉從之巡撫畿內風紀大振入掌南京都察院擢兵部尚書

李愷分省人物考江陵人景泰癸酉舉人知永新縣有梅花峒頑民梗化不供賦役愷至單車詣峒諭以利害人皆感化擢吉安同知

戴賓楚紀字彥邦荊州人天順甲申進士任南京刑部主事獄無冤滯歷四川按察僉事豪右侵地悉正版圖征白草寨克之陞兵備副使以憂歸

劉懋分省人物考字勉之江陵人成化壬辰進士授刑科給事中值汪直用事懋首劾之尊論昭德貴妃專寵廷杖詔獄出為浙江僉事丁憂歸不起家居數十年足跡不入城市

趙鑾分省人物考字廷振江陵人成化辛丑進士授大理評事廉恕詳審陞雲南僉事土官及掣肘難治者皆



湖廣通志 卷之五十三
宣於法勦平箐寨建昌與南詔相讐殺鑿躬往處分士
論偉之

劉渙明一統志江陵人成化辛丑進士令鄱陽明毅有
為築隄捍水長數千丈護田數千畝鄱民賴之以督役
疾卒民立祠祀

汪瑄分省人物考字德卿江陵人成化甲辰進士初令
華亭擢監察御史時闖李廣敗太宰屠瀟以為不必深
究瑄疏劾之數其黨護及壞選法數事後巡松江貪墨
者屏息

蔡暹楚紀字文輝江陵人成化辛丑進士知泰興有謀
殺叔母事無左驗屢詰不屈時方霖忽雷大震侍者股
慄給之曰後跪者為誰其人驚顧即所謀殺者遂伏罪
人皆神之召補太僕寺丞

李昂明一統志江陵人少有才名初知長寧尚書周洪
謨稱之曰長寧得賢令四湯行以善政胡諒克惠民朱
思明賢能昂則兼而有之考最陞潼川知州

劉悅江陵人懋子弘治癸丑進士由郎署歷蕪州知府
居官廉慎解組歸優游林泉與物無競後裔俱能世其
家學舊通志

朱志榮夷陵人正德戊辰進士官御史直聲震一時以
忤旨坐貶雖數罹憂危而風槩凜然不為稍屈
李夢祥字幼徵監利人嘉靖乙未進士為溫州司理執

法有聲時宰欲於城中鑿河環其府第祥持不可遂誣以他事五年始轉工部主事尋出知思南時苗攻思南急祥竭力捍禦思州石阡皆陷思南獨存

曹忭字子誠江陵人嘉靖辛丑進士選庶吉士累官雲南巡撫至性孝友內外無間

劉良宗字寅之監利人嘉靖癸卯舉人具經濟才令遂平轉成都府同知值龍州土司薛兆乾憑險干紀會兵進剿奉檄督餉詞得要領遣信使人巢獲渠以獻境內底定錄功陞守龍安解組歸家法嚴整足爲矜式

以上舊通志

蕭大賓分省人物考字敬夫先姓陳江陵人嘉靖甲辰

進士以直節自負初授上虞令治行卓越選御史糾彈不避權貴擒巨猾鄒玉塘歷官藩臬所至民德之以副都御史巡撫雲南賑荒歎正嫁娶民俗丕變發總鎮沐朝弼不法事羣黨悉治以罪陞工部侍郎

張居正三楚文獻錄字叔大江陵人幼稱神童嘉靖丁未登進士高第選庶吉士己酉授編修時少師徐階在政府見居正沉毅淵重深相期許首輔嚴嵩忌階諸善階者皆避匿居正行意自如甲寅請告歸卜築小湖山中益博極載籍通當世之務庚申以右春坊中允管國子司業尋進諭德侍講裕邸引經執義廣譬曲喻詞極剴切莊宗立累進禮部尚書兼武英殿大學士首陳省

海虞通志卷之三十三
議論振綱紀重詔令覈名實固邦本飭武備六事上嘉
納之會俺荅請入貢通互市衆議藉藉居正力贊成之
自是西北邊無烽火警水陸屯田皆墾治乃以建極殿
大學士加少師兼太子太保神宗嗣位居正爲首輔疏
言培養君德開導聖學爲第一要務因請行日講採古
帝王善可爲法者八十一事惡可爲戒者三十六事繪
爲帝鑑圖說上之六載考績進中極殿大學士時歲比
不登上屢詔賜民田租而郡國奉行不力居正請責有
司加意牧養凡逋久賦重度不能輸者悉除之又言京
通儲粟足支八年獨大帑無羨金而民復苦輸將請將
明年漕糧改折十之三足國裕民一舉兩得上善之有

詔修慈慶慈寧宮居正言兩宮規制甚備不宜時絀舉
羸亡何居正父卒累乞守制不允再疏乞歸裏事訖卽
敦迫還朝時上漸備六官太倉金帛多所宣進居正言
財賦有限使積貯空虛一旦有四方水旱之災疆場意
外之虞可爲寒心因進戶部錢糧數目請置座隅又請
罷鑄內庫大錢停蕪松織造及修武英殿工上多曲從
又請令翰林官分番入直質問經義陳說理道又奏屬
儒臣纂輯累朝寶訓實錄分類成書以經筵之暇進講
一日上御文華殿講訓錄畢以南京給事中傅作舟疏
進覽因言大江南北大饑或相聚爲盜卽如訓錄中所
載元末之亂亦始於此乞盡蠲積逋責各官發贖緩倉

穀以惠窮民又請量入爲出官中費用及服御可減者減之賞賚可裁者裁之若濫施僧道不如予吾赤子上爲感動旋加太師上柱國未幾居正病四閱月不愈訃聞上愴悼輟朝謚文忠遣官營葬後以言官追論於是奪居正封誥謚削諸子官籍其家敬修自縊死嗣修懋修俱謫戍天啟二年追論其輔幼主功復原官予祭葬仍行議謚房屋未變直者給子孫奉祠居住懷宗初復二廕給誥如初

龔大器字容卿公安人爲諸生拓落有大度嘉靖丙辰成進士授刑部主事歷官河南布政使平易近民不爲矯激所至多去後思性儉樸俸餘常分給族之貧乏者

年七十致仕歸子仲慶官監察御史

邑志

雷以仁夷陵人嘉靖己未進士歷陝西布政秉正不阿以清介冠天下居官布衣如寒士致仕歸囊無餘物子五人衣食粗給而已

舊通志

鄭重威字子修監利人嘉靖壬戌進士授遂寧令值歲大祲盜起發粟賑貸擢戶部郎陞臨安知府條陳五邦寧遠等州事宜如其議恢復故土幾千里累陞雲南右參政

王篆字紹芳夷陵人嘉靖壬戌進士歷官總憲吏部左侍郎有經世之畧張居正以天下才推之京師號爲鐵御史

潘彥富字龍淵監利人亢直不阿初任上元丞以清操著陞潞安府判

張汝濟字澤民江陵人隆慶戊辰進士累官都御史每入署必焚香告天杜絕私交及撫閩朝鮮告警往平之佐大司馬泛海征倭皆有戰功旋告歸築萬玉山房終老孫中柄懷宗庚午舉人曾孫之增領康熙己酉鄉薦張楚城字釐卿江陵人隆慶戊辰進士初令吉水歷兵刑吏三科因劾張四維邪僻上嘉其忠直分巡臨鞏按察山西皆有惠政歷遷雲南布政使晉太僕卿楚城長於詩賦其教民紡織詩有自今七夕秋風起吹落孤城織女多之句人傳誦之

易文簡夷陵人隆慶庚午舉人官評事好學深思性極友愛而起居有體子弟非衣冠不敢褻見

姜竒方號守冲監利人隆慶辛未進士嗜學力行不逐時趨初令宣城轉倅杭郡遷都勻守終轉運皆以治聲著

陳休字衡岡江陵人萬曆癸酉舉人授南川令舉卓異擢監察御史有目擊時艱條陳銓政請立東宮諸疏入侍經筵召對切直以終養歸

劉彥字晉所監利人中萬曆癸酉舉人性曠達善譚論弊掖後進人樂親其教益令金堂值歲旱助民灌溉是歲仍稔知廣安州所在稱治

李槩字斗池遠安人博學善屬文膺里選人北監爲高拱所器重令四川開縣決滯獄多所平反致仕歸貧不能具田宅

翟言字養默遠安人登里選令富順遷瓊州別駕時海寇竊發言身自招撫郡賴以安

黃家桂江陵人萬曆丙子舉人令潛潭歷二郡司理刑清訟簡兩地祠祀之

鄧炳字其文監利人萬曆庚辰進士授上海令剖決如流邑瀕海隅颶風作水溢民居炳全活甚衆性尤憐才禮士多所識拔歷補常熟長興擢戶部郎有饒商以千金請峻拒之

以上舊通志


張敬修三楚文獻錄字炎州文忠長子萬曆庚辰進士授禮部儀制司主事籍沒命下刑部侍郎邱擗等至荆於酷暑烈日中掠治慘烈因諷以誣所不快且旁撫荆大姓敬修獄中報擗書有先人在國數十年賞賚之外無私入賜第之外無別椽剛介之節海內共知等語擗得書考掠愈急敬修乃咋血爲書報諸鄉人決計一死以快怨者之心怨者謂時相張四維也張爲居正薦居政府至是傾擠無遺力敬修投繯死事聞詔畱田千畝室一區贍其祖母竝下詔切責當事失罪人不孥之義自是事少解懷宗卽位復敬修官以旌其孝還居正二廢孫同敞庶中書舍人後殉節

張懋修三楚文獻錄字斗樞居正第四子庚辰進士殿
試第一人授修撰積書好古清約如寒素中遭家難寬
憤投井不死不食者累日又不死遂脫屣一切日抱其
父手蹟每有感觸則嗚咽哭不成聲懷宗時公論昭雪
年八十卒仲兄嗣修丁丑榜眼齊名一時

李元寶字士貞監利人萬曆丙戌進士歷戶部郎陞守
鳳陽遷福建備兵防海當日本彭蠡之衝殫思籌畫無
間晝夜竟以勞瘁歿官子孝廉逢時往扶櫬歸惟圖書
數篋而已舊通志

袁宗道三楚文獻錄字伯修公安人萬曆丙戌會元選
庶吉士授編修歷官至右庶子時國本初定盡心啟沃
年四十有二卒以光宗東宮舊學贈禮部侍郎宗道在
翰苑當詞章盛行之日力排俗學於唐好香山集於宋
好眉山詩文嘗各其齋曰白蕪年雖不逮而公安詩文
一派實自宗道發之

雷叔聞字實先江陵人幼負雋才為諸生淹通經史登
萬曆戊子賢書學益博令蜀縣治尚風力豪右屏迹改
江南司李陞景東府丞後歸惟讀書城東別墅舊通志
陸師贄字岷源江陵人萬曆戊子舉人兄懷贄翁宗贄
先後登賢書師贄負經濟才監司都邑大事常就諮之
令江安入為監察御史時逆璫擅政師贄與楊左諸人
切齒璫黨胡芳桂疏劾之有東林羽翼楊漣密友之語



海虞通志 卷之五十三
卽日落職歸尤畱心江陵隄防流寇陷荆師贄舉家渡江避難憤鬱死

尤大治字恕甫江陵人萬曆戊子舉人知光州救荒活數萬人遷懷慶同知會福藩之國河南北造柵廠八處需用十六萬金大治督其事每廠費銀才四千民不苦役歷官慶遠守著有江陵水害說

李華國字含章江陵人少穎秀強學力行爲士林師表萬曆戊子舉於鄉子世恪端方博洽順治丙戌鄉舉任鳳陽司李治聲丕著孫震孫順治乙未進士授吏部主事丰采凝峻卒於官

楊逢時號春宇江陵人潛心理學制舉藝力追先正中萬曆丙子解元壬辰成進士歷官清廉仕至提學副有冰鏡之譽仕宦二十年歿之日家不能具舍斂清望

第一 以上舊通志

袁宏道三楚文獻錄字中郎公安人萬曆壬辰進士令吳縣聽斷明決以廉靜致理踰年投劾去後再補驗封司主事攝選事會猾吏私一姻戚已罷官仍畱之宏道廉得其奸大憤曰如此則銓柄盡歸此輩矣白冢宰先寘之法而後疏上竟以欺罔坐重辟銓曹設刑具自宏道始主試秦中通場文皆自搜閱所取半得於落卷中及榜出皆知名士試錄爲天下第一居吏曹二年給假歸卒年四十有三

朱光祚字上愚江陵人萬曆乙未進士初令錢塘改授
邯鄲擢吏部主事檢拔精明一時推重晉太常卿都御
史總河道卒於官

舊通志

劉芳節字元度宜都人萬曆丁酉鄉舉癸丑禮闈已見
收因策中議諷時政被黜與石首曾可前夷陵雷思濡
鼎峙兩人起家爲史官芳節志氣不少挫賈志以歿有
詩文若干卷行世

袁致道字雪里公安人萬曆庚子舉人選荆門教轉登
封令政尚和雅不嚴而理卒於官貧無以歸士民及上
官斂金助之邑民有送喪至家涕泣不忍去者

張斗樞字天都遠安人有美才讀書不輟寒暑萬曆丁
未成進士筮仕魯山地多輿草樞買犢給墾調永城尤
勤課士擢天下廉幹第一遷南銓部

謝文錦字元中江陵人萬曆癸丑進士授行人陟御史
巡按江西有聲歷官兵部侍郎疏載各臣奏議天啟時
魏璫焰熾錦無所依附三王分封錦抗疏憂及國本

徐鑛字大冶江陵人生而聰慧父訓甚嚴萬曆癸丑成
進士後歷任銓曹有清通之譽建陽春書院於鄉後進
多所造就歷官右僉都御史

以上舊通志

曹大成三楚文獻錄字元和江陵人萬曆丙辰進士令
鹽城山陽兩縣入爲禮科時因倭封貢事數言官疏論
輔臣趙志臯及張位沈一貫語多切直位以宿怨疑成

又疏請東宮亟行大禮留中不報遂因趙南星事去而
名益重咸居家孝友築防捍水邑人德之

王曰善字天衢江陵人少孤力學萬曆丙辰成進士令

邯鄲編里賑荒課士有法行取禮部分校鄉會兩闈一

時稱爲得人後陞尚寶寺正卿

舊通志

袁中道分省人物考字小修宏道第十歲作黃山雪二

賦五千餘言長益豪邁遍遊燕趙齊魯吳越之地萬曆

丙辰舉進士授徽州府教授歷遷南吏部郎中旋乞休

後寓金陵以疾卒年五十有四子祈年字未央舉人少

有雋才嗣宗道後

謝璉字君實監利人與弟道同舉於鄉萬曆丙辰進士

授南兵部主事歷遷廣東右轄擢都御史巡撫登萊贈

兵部侍郎賜祭葬廕一子

舊通志

金秉乾江陵人字元甫萬曆己未會魁選庶吉士魏璫

擅政力請終養里居七年絕口不道時事懷宗初以清

望擢用歷經筵講讀晉官詹卒官贈禮部尚書廕一子

子震出另傳

傅公朝遠安人博學謙謹由歲貢授萬年丞居官清廉

惟一僕自隨卒於任囊無餘積喪具蕭然百姓哀之

李開國字肇侯江陵人讀書務本力行孝友子世濟順

治戊子鄉薦授廣元令持已廉潔有惠政

陳邦靖號兩峯夷陵人任閩縣晉南司城御勅褒之有

不愧金吾之語同知定州性勤慎所至有冰蘖聲
鄧應捷字濟民監利人明經為隨州訓歷陞墊江令邑
有大辟百餘察其誣者數十人釋之後獻賊入蜀強授
偽職拒不受從間道逃遇前所脫者數人効死捍衛卒
免於難未幾卒子鍾岱扶櫬歸里

文安之字汝止夷陵人天啟壬戌會魁歷南國子祭酒
文章各世器識宏遠晚登政府節槩凜然年七十子十
一人


陳治紀字道立江陵人天啟甲子舉人任行唐令陞戶
部郎中權稅杭州奏革積弊五千餘條督餉浙西奏免
積欠八千七百餘金出繫獄四十六人

吳伯琦字調陽夷陵人初知雅州吏事勤敏擢守石阡
明季人樂從桑門教琦獨以理自勝不為所惑

夏雲鼎字四雲石首人天啟甲子舉人有雋才下筆數
千言立就嘗試地動解援引漢儒洪範五行及歷代災
異不假思索頃刻成屢困公車乃乞新野教諭臺使者
奇其才薦陞涪州牧

孟名世字翼野荊州人天啟乙丑進士令江浦泰興二
邑潔已愛民暇則與諸生課藝歸里日布衾圖書視諸
生時無異

黃光中江陵人天啟丁卯舉人令江西潔已奉公愛民
如子嘗有人以里下條銀納縣偶失於途中將鬻妻子



賠償中訪得其情卽免其額人戴之如父母子士璵康熙丁未進士

胡克敬字孟嘗江陵人淹貫羣書嘗言學者立身當從踐履上著脚跟立言當從經史中討本領尊德性道問學二者不可偏廢故於考亭學多所發明孝友義方爲時推服先後從學者甚衆尊爲理學醇儒

劉楷字甸方江陵人少爲諸生苦讀書有膂力懷宗丙子賊寇荆州掠沙津楷憤呼於市率義勇楊黃毛等數十人伏東關杉橋門扼其歸路賊至楷突呼而起奮勇直前斬一賊頭大如斗其盛甲刀劍有金嵌八大王字楊黃毛及十餘人歿於陣衆賊披靡去荆圍以解

徐養心字松濤江陵人懷宗辛未進士令當塗有治聲分校江南所得多名士丁丑授監察御史丰采凜然疏論錦衣馬直廵方江右威惠竝著

潘世標字翰鹿監利人性至孝母病癱親爲吮之尋愈博學洽聞督學董其昌甚器之由副榜令資縣潔已愛民所簡拔多高第獻賊之亂子有穀有彝俱殉難

李郁字無文宜都人官西城兵馬司辛酉重慶之變浮屍蔽江郁收葬約五十有奇甲申獻賊屠城爲賊所掠遂被害以上舊通志

皇清文崇熹字鹿講江陵人順治時授開封府推官辨冤理枉吏澄民又陞工部主事錢法水利實心剔釐河

開諸議倍極精詳以病歸

金震出字鳴遠江陵人順治三年十月大兵南下定贛震出以十一月參藩嶺北時贛民子遺十無一二兵卒猶拷詰財物震出至力請諸將禁止又勸各營釋歸難婦城內外白骨成邱捐貲瘞埋不可數計虔父老至今頌之

竺鳳仞字輝下江陵人少孤與弟鳳騰苦志力學閱覽博聞事母馮氏至孝鳳仞登明末己卯賢書鳳騰及堂弟鳳元俱中順治戊子鄉試

戴昌運字仲平江陵人家世蕃衍詩禮相傳昌運尤孝友力學教誨不倦次子縱癸丑進士其餘諸子姪執經問業無不造就有成鄉中推為模範

沈延緒字文孫江陵人順治辛卯與弟延標同登鄉薦至性孝友踐履篤實授沔縣令愛民禮士清理訟獄慈惠丕著

李永庚字上章江陵人順治辛丑進士令新鄭地處衝煩隨事肆應墾荒飭驛材能著聞擢御史未任卒曹國樸字楨之江陵諸生光祿大咸第五子博學嗜古砥礪品行以不愧屋漏自矢諸從其訓迪者皆有濂洛關閩之傳

李冲霄字六翻枝江人世以儒業顯孝友忠信見義敢為食貧授徒務明道義成順治戊戌進士令清苑

有古循良風

周克友字來公安人天資敦厚順治乙未選拔考選教習長於傳誼之學一時多所造就令潛山歷陞河州牧居官皆有惠政卒之日至不能殮州人哀之劉懋夏字公蕃監利人性淳篤力行孝友博聞強記順治乙未進士任青州司理判決公平昭雪冤誣以明慎著聞

胡年穎字玉粟江陵人幼穎異詩文雋爽援筆立成性孝友其事大母及父母每晨必至寢所問起居備極愉婉丁巳江南補鄉試得售未幾卒年未三十

以上舊通志

宋學洙字長修江陵人順治丁亥進士由翰林歷吏部文選司典試河南以母老歸養郡邑興革諸大政當事咸就咨訪有裨地方者知無不言言無不盡嘗考故相張居正致禍之原爲辨其謗子天成明經竹山教諭孫畬舉人息縣令

龍之繩字孝公公安人順治戊子舉人好善嫉惡憐恤孤寡邑中利弊每剴切指陳康熙甲辰令新會時再定邊界民疲道路之繩力爲撫恤却餽遺革加耗一意與民休息有構訟者以理開譬往往懷牒去甫三月以疾致仕百姓送之哭失聲云

鄧臨霄字雲卿江陵人順治丁酉舉人性孝友事兩

繼母咸得其歡心異母弟幼撫之成立邑苦隄老更
換之役霄言於大吏永爲禁止又城隍淵一帶隄毀
襄水泛濫不可禦霄虔禱水爲卻退得堵塞三門修
復潰決年八十八卒

周士元監利人嫻韜畧吳逆變奮志從戎隨總督蔡
毓榮進攻辰龍關爭先血戰追擒馬寶所在有功部
帥黎耿然深器重之薦於滇黔總制范承勳授雲南
督標守備歷陞嚴協副將嚴郡被水亟買舟拯救先
購米以備賑全活無算晉福寧鎮總兵平巨寇高松
香設沿途巡遊官以稽察非常閩東安枕又開河通
海貨殖繁興調南澳總鎮會海賊陳君元逃亡計擒
之設立砲臺修築城垣以勞瘁卒

勛祭葬

楊之陞監利人由行伍征平吳逆隨總鎮萬赴閩勦
海寇克復海壇又出洋復金門廈門等處銃傷左股
功上優敘歷陞象山遊副因傷發乞休歸卒

蔣遠發字貽孫江陵人康熙己未進士令孝豐遷曹
州牧每決疑獄洞鑒如神兩地之民咸感服因母老
乞休色養備至遇後進恂恂恭謹卻輿馬徒步桑梓
間人皆多其淳樸

